

- प्रधानमंत्री नरेन्द्र मोदी पश्चिमी एशिया संकट रे चालता खाड़ी देशां मांय रह रिया भारतीयों री सुरक्षा री प्रतिबद्धता दौहराई।
- रायसीना संवाद-2026 काल सू नई दिल्ली मांय- फिनलैंड रा राष्ट्रपति अलेक्जेंडर स्टब खास वक्ता व्हेला।
- उपमुख्यमंत्री प्रेमचन्द बैरवा राष्ट्रीय सुरक्षा दिवस माथे जयपुर मांय राख्या राज्य स्तरीय जळसा मांय शिरकत करी-विकास खातर सुरक्षित औद्योगिक वातावरण जरूरी बताया।
- प्रदेशभर मांय आज भी धुलण्डी रो उच्छाव-केई ठौड़ां माथे होळी खेली जा री है।

000

प्रधानमंत्री नरेन्द्र मोदी पश्चिमी एशिया संकट रे चालता लारला दो दिनां मांय घणखरां वैश्विक नेतावां ऊँ बातचीत करी है। श्री मोदी फोन माथे यूएई, इजराज, साउद अरब, जोर्डन, बहरीन, ओमान, कुवैत अर कतर रा नेतावां सागे बातचीत करी है। श्री मोदी बदळता वैश्विक हालात माथे गहरी चिंता जताई। सागे ई शांति सुरक्षा अर लोगां री भलाई रे खातर आप री इमदाद री बात दौहराई। प्रधानमंत्री खाड़ी देशां मांय रह रिया भारतीय समुदाय री देखभाल अर सुरक्षा खातर आ देशां रा ठावां नेतावां रो आभार जताया। प्रधानमंत्री इण देशां रे सागे आप रा संबंधां रो हवालो देता थकां कह्या के भारत शांति अर स्थिरता री वकालत करे है। भारतीय समुदाय री सुरक्षा वां री पैली प्राथमिकता है। इण बीच विदेश मंत्रालय पश्चिम एशिया अर खाड़ी हलका रा मौजूदा हालात ने ध्यान मांय राखता थकां नियंत्रण कक्ष थापित कर्यो है। इण ने इतर संघर्ष रा हलकां मांय भारतीय दूतावास सुरक्षा उपाय अर वठे ऊँ लोगां ने काडबा रा उपाया मांय मदद करबा खातर 24 घंटा आपात हेल्पलाइन भी शुरू करी है। पश्चिमी एशिया मांय चाल री तणा-तणी री बजह सू वठे फस्यां यात्रियां री आवाजाही पक्की करबा खातर भारतीय विमान कंपनियां री आज 58 उड़ानां चलावां री योजना है। नागर विमानन मंत्रालय रे मुजब इण मांय इंडिगो री 30 अर एयर इंडिया एक्सप्रेस री 23 उड़ानां भेळी है। मौजूदां हालात री वजह सू भारतीय विमानन कंपनियां री एक हजार दो सौ 21 अर विदेशी एयरलाइंस री तीन सौ 88 उड़ानां रद्द व्हे चुकी है। यात्रियां ने हवाई अड्डा पूगबां सू पैली संबंधित विमानन कंपनी सू उड़ान री ताजा जाणकारी लेबा ने कह्यो गयो है। अमेरिका-इजरायल अर ईरान रे बीच चाल रह्या तनाव अर युद्ध री वजह ऊँ नागौर जिला रा एक मोटयार री मौत व्हे गयी। ओ ओमान खासब पोर्ट माथे खड्या जहाज मांय तैनात हो अर ईरान री कानी ऊँ दागी गई मिसाइल री वहज सू हमला रो शिकार व्हे गयो। नागौर रा जिला खीवताना रा रहवासी दलीप सिंह जनवरी मीना मांय ई मर्चेन्ट नेवी मांय ड्यूटी ज्वोइन करी ही।

000

नई दिल्ली मांय काल सू रायसीना संवाद 2026 राख्यो जा रह्यो है। विदेश मंत्रालय, स्वतंत्र थिंक टैंक अर आर्वजर्वर रिसर्च फाउण्डेशन-ओआरएफ री कानी ऊँ 7 मार्च ताई इण रो आयोजन कर्यो जावेला। ओ संवाद भारत रो पलैगशिप रणनीतिक फोरम बण गयो है। जो हर बरस वैश्विक नेतावां, मंत्रियां अर सुरक्षा विशेषज्ञां ने रिझावे है। रायसीना संवाद माथे बत्ती जाणकारी न्यूज डेस्क ऊँ दे री है म्हाकी सहयोगी डॉ. सालेहा गाजी-

000

राष्ट्रीय सुरक्षा दिवस रो राज्य स्तरीय जळसो आज जयपुर मांय लोक प्रशासन संस्थान मांय मनायो गयो। उद्योगां मांय सुरक्षा ने बढावा अर काम री ठौड़ माथे सुरक्षा कानी ऊँ जाग जगावा वास्ते ओ दिन मनायो जावे है। उपमुख्यमंत्री प्रेमचन्द बैरवा राज्य स्तरीय जळया मांय कह्या के विकास खातर सुरक्षित औद्योगिक वातावरण घणो जरूरी है। सुरक्षित काम री ठौड़ ई उद्योग रा विकास री नीव है। श्री बैरवा उद्योगां मांय सुरक्षा संस्कृति अपनाबा ने टेम री जरूरत बताया। वे कह्या के सुरक्षित माहौल ई उद्योगां री उत्पादकता बढाबा रे सागे मजूरां रा जीवन री सुरक्षा पक्की करे है। वणा औद्योगिक इकाइयां मांय सुरक्षा नियमां री कड़ाई सू पालना करबा अर टेम माळे होबा वाळा खतरां रो अंदाजो लगाबा ने दुर्घटनावां री रोमथाम माथे सहायक बताया। कार्यक्रम मांय कारखाना सुरक्षा पुरस्कार योजना रे तैत औद्योगिक सुरक्षा रा हलका मांय चोखा काम करबा वाळी 15 इकाइयां रो मान कर्यो गयो। इण मौके सुरक्षा जागरूकता पुस्तिका रो भी विमोचन भी कर्यो गयो।

000

रंगां रो तिवारं होळी आज भी प्रदेशभर मांय मनायो जा रह्यो है। ओ दिन वसंत ऋतु रा आबा रो प्रतीक है। ओ दिन लोग एक-दूजा रे रंग-गुलाल लगा र, आपसी भाईचारा अर मेल-मिलाप रे सागे

मनावे है। इण मौके लोग एक-दूजां रो मुंह मीठो करवा र होळी री बधायी देवे है। पिचकारियां सू निकळतो रंगीन पाणी टाबरां मांय उछाव अर उमंग भरे है। इण रे सागे ई चंग-डफ री थाप समूचा माहौल ने बदळ देवे है।

इण मौके केई ठौड़ां माथे सांस्कृति कार्यक्रम भी राख्या जावे है। पूजा-पाठ री ठौड़ां माथे होळी रे मौके रंगोत्सव री खास झांकियां सजाई जावे है। डीग-भरतपुर मांय फूलां रे सागे लटटमार होळी भी खेळी जावे है वठिने गांवाई हलकां मांय होळी रे मौके केई भांत री अणूठी परम्परावां भी होवे है। प्रदेश भर मांय होळी रे चालता लोगां मांय जबरदस्त उछाव देखबा ने मिल रह्यो है। भीलवाड़ा मांय भगवान देवनारायण री जन्म री ठौड़ मालासेरी मांय गैर नृत्य राख्यो गयो। वठिने कोटपूतली-बहरोड़ मांय पर्यावरण संरक्षण रा प्रतीक संत टीलाजी महाराज री तप री ठौड़ पेड़-पौधा री पूजा कर होळी री बरसा पैली री परम्परा पूरी करी गयी। करौली मांय इण टेम पर्यावरण रे मुजब तिलक होळी रो चलन भी उछाव रे सागे देखबा ने मिल रह्यो है। धूलण्डी माथे कोटा मांय भी अबीर-गुलाल री धूम रही। टाबरां सू ले र बड़ा बुजुर्गां ताई रंग-गुलाल रे सागे गीत-संगीत रो आनंद लेता निजर आया। बड़ी तादाद मांय देशी-विदेश सैलाणी राजस्थान री पर्यटन री ठौड़ां माथे होळी रो आनंद लेबा पूग्या। वणा होळी रा तिवारं रा यादगार अनुभव साझा कर्या।

राजधानी जयपुर मांय आज मुख्यमंत्री रहवास माथे होळी स्नेह मिलन कार्यक्रम राख्यो गयो। मुख्यमंत्री भजन लाल शर्मा जळसा मांय प्रदेश भर सू पूग्या लोगां रे सागे होळी रा उछाव रा रंग साझा कर्या। सोशल मीडिया पोस्ट मांय मुख्यमंत्री होळी री बधाई देता थकां सगळा रा जीवन मांय सुख शांति अर धन-धान होबा री कामना करी। होळी रे मौके सुरक्षा बाबत प्रदेश भर मांय पुलिस प्रशासन पूरी भांत मुश्तैद है। न्यारी-न्यारी ठौड़ां माथे पुलिस पलैग मार्च काड र लोगां ऊँ शांतिपूर्ण तरीका सू होळी मनावे री अरज करी।

000

हर बरस 8 मार्च ने मनाया जाबा वाळा **अन्तर्राष्ट्रीय महिला दिवस** रे मौके राख्या हफता रे तैत प्रदेश भर मांय केई कार्यक्रम होबे है। इण बरस भी महिला अधिकारिता मेहकमां री कानी ऊँ केई कार्यक्रम राख्या जा रह्या है। इणी कडी मांय पाली मांय आज मीडिया कार्यशाला रे मार्फत सरकार री केई योजनावां री जाणकारी दी गई। मेहकमां रा उप निदेशक भागीरथ चौधरी रे मुजब काल सगळा आंगनबाड़ी केन्द्रां माथे महिलावां अर टाबरियां री एनीमिया जांच करी जावेला। वठे ई आत्मरक्षा प्रशिक्षण रो कार्यक्रम भी व्हेला।

महिला दिवस रे मौके राजधानी जयपुर मांय दो दिन रो कार्यक्रम **शक्ति वंदन** राख्यो गयो। जवाहर कला केन्द्र मांय होबा वाळा इण कार्यक्रम मांय महिला सशक्तिकरण सू जुड़ी हस्तियां अर विशेषज्ञ जुटेला। इण मौके शक्ति कवच अभियान रे तैत 14 बरस री 1000 सू बत्ती टाबरियां ने मुफ्त एच.पी.वी. टीका लगाया जावेला।

000

प्रदेश मांय गर्मी रा बढ़ता असर रे चालता पारो लगातार बढ़तो जा रह्यो है। पश्चिमी इलाकां मांय दिन री टेम झुलसाबा वाळी गर्मी रो असर बढ़ रह्यो है। सब ऊँ बत्तो तापमान आज बाड़मेर मांय रियो। अठे पारो 38 दशमलव 8 डिग्री सेल्सियस रे पार पूग गयो। वठिने जैसलमेर, जोधपुर, बीकानेर, पाली, चूरू, नागौर अर चित्तौड़गढ़ अर डूंगरपुर समेत केई जिलां मांय बढ़तो तापमान 36 डिग्री सेल्सियस सू बत्तो माप्यो गयो। केई ठौड़ां माथे आ दिनां तापमान 32 डिग्री सेल्सियस सू 35 डिग्री सेल्सियस रे बीच दर्ज कर्यो गयो। प्रदेश मांय आवता दो-तीन दिनां मांय तापमान मांय बढ़ोतरी रा आसार है। मौसम मेहकमो आवण वाळा तीन-चार दिनां मांय बत्ता तापमान मांय 2 सू 3 डिग्री री बढ़ोतरी रो अन्दाजो जतायो है। इण रे सागे ई लोगां ने दोपहर री टेम तेज धूप सू बचवा अर चावतो पाणी पीबा री सलाह दी है।

000